

Na osnovu člana 106. Zakona o visokom obrazovanju („Službene novine Kantona Sarajevo“, 36/22) i Pravila studiranja za prvi ciklus studija na Univerzitetu Sarajevo School of Science and Technology (Univerzitet SSST), Univerzitet SSST o b j a v l j u j e

KONKURS
za upis studenata u prvu godinu I ciklusa studija i integriranog studija na Univerzitetu Sarajevo School of Science and Technology u akademskoj 2024./2025. godini

Konkurs se raspisuje za upis u prvu godinu prvog ciklusa studija i integriranog studija u akademskoj 2024./2025. godini, koji se organizira na fakultetima Univerziteta Sarajevo School of Science and Technology (u daljnjem tekstu: organizacione jedinice).

Terminološko korištenje muškog ili ženskog roda u ovom konkursu podrazumijeva uključivanje oba roda.

Prijava kandidata na Konkurs za upis u prvu godinu prvog ciklusa studija i integriranog studija provodi se isključivo online putem web stranice www.ssst.edu.ba od **10. juna do 15. septembra 2024. godine.**

U prvu godinu studija u akademskoj 2024/2025. godini kandidati se upisuju u skladu sa planom upisa studenata, kako slijedi:

FAKULTET ZA KOMPJUTERSKE NAUKE:

- 70 redovnih studenata

FAKULTET ZA INFORMACIONE SISTEME:

- 50 redovnih studenata

FAKULTET ZA EKONOMIJU:

- 40 redovnih studenata

FAKULTET ZA POLITIČKE NAUKE I MEĐUNARODNE ODNOSI:

- 35 redovnih studenata

Godišnja školarina na gore navedenim Fakultetima iznosi KM 11.343,80 odnosno u protivrijednosti 5.800 EUR, za studente državljanke BiH, a za studente strane državljanke iznosi 15.646,65 KM odnosno u protivrijednosti 8.000.00 EUR.

Napomena: Godišnja školarina za studijski program „Game Design and Development“ na Fakultetu za kompjuterske nauke iznosi KM 15.255,45 odnosno u protivrijednosti 7.800 EUR za studente državljanke BiH i studente strane državljanke.

MEDICINSKI FAKULTET:

- **Studijski program Opšta medicina – 70 studenata**
- **Studijski program Stomatologija- 30 studenata**
- **Studijski program Farmacija – 30 studenata**

Godišnja školarina iznosi 15.451,05 KM odnosno u protivrijednosti 7,900.00 EUR za studente državljanke BiH. Godišnja školarina za strane državljanke iznosi 25.816,95 KM odnosno u protivrijednosti 13.200,00 EUR.

Po okončanju studija na studijskim programima Medicinskog fakulteta Univeziteta SSST stiče se zvanje doktora medicine, odnosno doktora stomatologije, magistra farmacije, bachelor zdravstvenih studija.

OPĆE ODREDBE

Pravo učešća na Konkursu pod jednakim uvjetima imaju državljani Bosne i Hercegovine i strani državljani sa završenom srednjom školom u četverogodišnjem trajanju u Bosni i Hercegovini, kao i kandidati koji su srednju školu završili izvan Bosne i Hercegovine, a za koje je nakon postupka nostrifikacije odnosno ekvivalencije utvrđeno da imaju završeno adekvatno obrazovanje za nastavak školovanja.

Izuzetno, kandidati koji su srednju školu završili izvan Bosne i Hercegovine imaju pravo učešća na Konkursu i prije izvršene nostrifikacije odnosno ekvivalencije svjedočanstva o završenom srednjem obrazovanju u inozemstvu, ali se u prvu godinu studija mogu upisati nakon izvršene nostrifikacije odnosno ekvivalencije o završenom srednjem obrazovanju u inozemstvu, a najkasnije do početka akademske 2024/2025. godine.

Pravo učešća na Konkursu i polaganje prijemnog ispita imaju i kandidati sa završenom srednjom školom po međunarodnim programima koji su odobreni od nadležnog Ministarstva, kao i kandidati iz država nastalih nakon raspada SFRJ, s tim što su dužni dostaviti svjedočanstvo o završenoj srednjoj školi odnosno nostrificirano svjedočanstvo za kandidate koji prethodno obrazovanje nisu završili u Bosni i Hercegovini prije početka upisa.

Ukoliko ovi kandidati prilikom predaje dokumentacije za upis nemaju nostrificirano svjedočanstvo, Univerzitet je dužan zaprimiti ostalu dokumentaciju i uključiti kandidata u postupak za upis, ukoliko kandidat koji ispunjava uvjete konkursa, a nalazi se na rang-listi kandidata koji su položili prijemni ispit u okviru odobrene kvote studenata za upis na odabranu organizacionu jedinicu, može upisati u prvu studijsku godinu prvog ciklusa studija prije izvršene nostrifikacije odnosno ekvivalencije svjedočanstva, uz prezentaciju potvrde da je postupak priznavanja odnosno ekvivalencije po njegovom zahtjevu u toku i da kašnjenje u donošenju odgovarajućeg rješenja nije rezultat njegovog propusta koji mu se može staviti na teret.

Prijem i upis studenata u prvu godinu studija provodi posebna komisija koju imenuje nastavno-naučno vijeće organizacione jedinice.

Izbor kandidata vršit će se na osnovu vrednovanja rezultata na prijemnom ispitu, vrednovanja ocjena iz predmeta relevantnih za odgovarajući studijski program.

Prijemni ispit vršit će se testom u pisanom formom u ovjerenom duplikatu od čega jedna kopija ostaje organizacionoj jedinici, a druga kandidatu. Preliminarnu rang-listu svih primljenih i prijavljenih kandidata organizacione jedinice će objaviti na web stranici i oglasnoj ploči nakon što je verificira nastavno-naučno odnosno nastavno-umjetničko vijeće organizacione jedinice, najkasnije dva dana od posljednjeg dana polaganja prijemnog ispita.

Na objavljenu rang-listu kandidati mogu uložiti pisani prigovor nastavno-naučnom odnosno nastavno-umjetničkom vijeću organizacione jedinice u roku od tri dana od dana objavljivanja liste. Ukoliko kandidat ima prigovor na rezultate postignute na prijemnom ispitu, prigovor dokazuje ovjerenim duplikatom testa sa prijemnog ispita. Nastavno-naučno odnosno nastavno-umjetničko vijeće organizacione jedinice dužno je da u roku od tri dana odluči o prigovoru kandidata i o tome ga obavijesti pisanom formom. Odluka nastavno-naučnog odnosno nastavno-umjetničkog vijeća je konačna.

Za prijave na Konkurs za upis u prvu godinu I ciklusa studija i integriranog studija kandidat je dužan skenirati i uploadovati sljedeće originalne dokumente:

- svjedočanstva o završenim razredima srednje škole završene u Bosni i Hercegovini u četverogodišnjem trajanju odnosno odgovarajuće nostrificirane dokumente za kandidate koji srednju školu nisu završili u Bosni i Hercegovini (ukoliko su dokumenti u postupku nostrifikacije, prilažu se prevedeni i od sudskog tumača ovjereni dokumenti),
- diplomu o završenoj srednjoj školi,
- izvod iz matične knjige rođenih,
- uvjerenje o državljanstvu

Prijave podnesene poslije utvrđenog roka, kao i nepotpune prijave neće se uzimati u razmatranje.

Univerzitet SSST je obavezan su da prije upisa studenata u studijsku godinu na javan i transparentan način objavom na oglasnoj ploči i svojoj web stranici upoznaju sve studente sa pravilima studiranja, nastavnim planom i programom, te akademskom titulom i stručnim zvanjem koje se stiče nakon završetka studija.

Kandidati koji, u skladu sa Konkursom, budu primljeni na odgovarajući studijski program, za upis u prvu godinu studija, pored već predatih dokumenata, podnose:

- upisni, semestralni list i ŠV-obrazac,
- upisnicu – indeks i
- ljekarsko uvjerenje.

Kandidatima koji nisu primljeni organizacione jedinice omogućit će preuzimanje dokumentacije u roku od 7 dana od dana objavljivanja konačne rang-liste.

